

欽定全唐文

卷一百
二十一

欽定全唐文卷一百二十一目錄

漢隱帝

李濤罷相制

誅李崧等詔

誅劉景巖後放免其子行謙等詔

慰諭馬希萼詔

贈劉審交太尉詔

賜郭威平李守貞詔

修飾兩漢陵園勅

定節度使奏薦屬官勅

委長吏親慮囚勅

給復三京勅

修高祖實錄勅

免王松官勅

暑月斷刑勅

決滯獄勅

注擬令錄限年勅

修晉朝實錄勅

宣示冬集人候闕除授勅

詳核增戶添租勅

封錢宏俶爲吳越國王玉冊文

即位大赦文

春令赦文

欽定全唐文卷一百二十一

漢隱帝

帝諱承祐高祖第二子後唐長興二年生乾祐元年二月封周王即皇帝位在位三年年二十周廣順元年追謚曰隱皇帝

李濤罷相制

朕虔承遺訓嗣守鴻基嘗懼眇冲不克負荷所以師臣畏相稽衆從人採沃心造膝之謀詢繼體守成之道其或力非任重才不迨時有玷天工顯貽物議宜從罷免用儆厥

愆開國佐命輔聖功臣光祿大夫行中書侍郎兼戶部尚書同中書門下平章事上柱國隴西縣開國伯食邑七百戶李濤早預朝倫素虧時望繼踐清華之列曾無倖儻之名先皇帝應運開階濟物成務未明求理虛已待賢擢自禁林升之槐路旣委宰衡之任蔑聞帷幄之謀迨及眇躬初親庶政被顧問之際屢覩醺酣當獻替之時無聞詆訐復虧嚴重但務詆諧詎爲君子之儒殊失大臣之體重以梓宮在殯國步多艱屢陳違衆之言頻建出師之議率爾獨見豈是臧謀朕方務含宏冀全終始雖包荒而在念慮

假器以興譏俾輟中樞式存大體仍令還第庶用省躬惟爾自貽無我有怨苟能思過豈吝推恩可罷免勒歸私第

誅李崧等詔

稔惡圖危難逃天網虧忠負義必速神誅李崧頃在前朝最居重位略無裨益遂致滅亡及事契丹又爲親密士民俱憤險佞可知先皇含垢揜瑕推思念舊擢居一品俾列三師不謂潛有包藏謀危社稷散差人使潛結姦凶附近山陵擬爲叛亂按其所告咸已伏辜宜正典章用懲姦逆其李崧李嶼李義一家骨肉及同謀作亂人並從極法

誅劉景巖後放免其子行謙等詔

劉景巖年已衰暮身處退閒曾無止足之心輒肆包藏之
毒結集徒黨窺伺藩垣所賴上將輸忠三軍協力盡除醜
類克殄渠魁其劉景巖次男前德州刺史行琮已行極法
長男渭州刺史行謙孫男邢州馬軍指揮使崇勲特放

慰諭馬希萼詔

所修職貢舊有規程念航深梯險之勞重違卿意在誘善
勸忠之道本實朕心今後凡有進獻可與希廣商量庶叶
雍和不爽體制

贈劉審交太尉詔

朝廷之制皆有舊章牧守卒官比無贈典其或政能殊異
惠及蒸黎生有令名歿留遺愛褒賢獎善豈限彝章可贈
太尉吏部所請宜依

賜郭威平李守貞詔

李守貞頃在前朝驟承委遇迨事先帝復委藩垣效淺功
微寵深位大而狡性難制小器易盈蔑義虧忠窮凶極逆
江海不能流其惡鼎鑊不足快其誅卿憤激於心義形於
色覩茲妖孽志在翦除動息之間必思於經略寢食之際

無忘於寇讎撫士愛人分甘共苦躬臨矢石親冒梯衝揮
戈而蛇豕就誅破竹而金湯失險氛霾既息宗社再安非
我元臣莫隆景運朕之倚愛何止寢興言念辛勤無忘嘉
愧

修飾兩漢陵園勅

我國家肇迹豐沛膺籙并汾蓋承積德之靈再享配天之
業四百年之洪緒一千載之遺風乃祖陵園先時廟貌屬
累朝之隔越諒如在之因循將明追孝之心當盡奉先之
敬天下州府應有兩漢諸帝王陵園廟宇宜令所屬長吏

檢討量加修飾其陵園側近禁止芻牧樵採

定節度使奏薦屬官勅

設官分職朝廷自有規程薦士延才州郡合存體式應諸道節度防禦團練刺史奏薦判官書記支使推官令錄簿尉等親人之官不易入幕之賓尤難必取當仁庶聞幹事守臣奏薦朝廷選除素有明文咸拘定制近年以來除人或虧允當薦士多昧選求體制旣踰紊亂滋始遐邇將期於致理奏除宜在乎擇才況有舊章足爲常式其諸道行軍副使兩使判官並不得奏薦委中書門下選除帶使相

節度使許奏節度掌書記觀察支使節度推官不帶使相
節度使只許奏節度掌書記節度推官其防禦團練判官
刺史判官等聽奏仍許精選才能其唐朝晉朝前項條貫
並可舉行永爲規制所奏薦州縣官自有銓衡不可侵越
以勅內舊人數許奏使相三人不帶使相二人防禦團練
刺史一人爲定仍付所司

委長吏親慮囚勅

政貴寬易刑尚哀矜慮滋蔓之生姦實軫傷而是念今屬
三元改候四序履端將冀和平無如獄訟應三京鄴都諸

道州府見繫罪人委逐處長吏躬親慮問其於決斷務在
公平但見其情即爲具獄勿令牽引遂致滯淹無縱舞文
有傷和氣

給復三京勅

先以兵甲至多糧儲不給權於苗畝之上遂有紐配之煩
雖年歲之頻登諒黎民之艱窘固非獲已深用軫懷今則
雨雪及時陽春布澤宜順發生之令特覃優卹之恩冀閭
里之安居俾農桑之樂業應三京鄴都諸道州府所徵乾
祐元年夏秋苗稅及紐徵白米稈草據今年二月一日已

前已納外見係欠數並宜特放布告遐邇體朕意焉

修高祖實錄勅

載唐虞之盛傳彼古文明得失之由存乎信史恭惟高祖
皇帝受天歷數纘漢基圖戎虜蠻夷懾靈旗而內附禮樂
征伐建王道於大中功格於上元化行於率土將欲示其
軌範約彼春秋接高光紀聖之書續班馬記言之典廢而
不舉闕孰甚焉左諫議大夫賈緯左拾遺竇儼右拾遺王
伸等才學淵深論辯鋒起分職方提於直筆編年允屬於
鴻儒宜令緯等同修高祖實錄呈進仍令宰臣蘇逢吉監

修

免王松官勅

松事因有玷誠切上章述避嫌之辭形告退之意其男仁寶雖因除名曾受僞官一昨旣翦兇酋合從俘執未明死所乃漏刑書路歧難限于山河情愛且關於父子便議連坐恐失寬條以爾朝列舊臣班行宿德累有退閒之請宜引軫惻之恩特俾免官用明減等宜停見任

暑月斷刑勅

月戒正陽候當小暑乃挺重出輕之日是恤刑議獄之辰

有罪者速就勘窮薄罰者畫時疏決用符時令勿縱滯淹
三京鄴都諸道州府在獄見繫罪人宜令所司疾速斷遣
無致淹滯枉濫

決滯獄勅

王化所先獄訟攸切不惟枉撓兼慮滯淹適當長養之時
正屬煖蒸之候累行條貫俾速施行靡不丁寧未曾奏報
再頒告諭無或因循應三京鄴都諸道州府詔至宜具疏
放已行未行申奏無致逗留

注擬令錄限年勅

令錄之任責辦非輕用捨之間尤宜適中少小者未曾履
歷則爲政必䟽衰晚者已及耄期則臨民多廢須期慎選
以擢吏能起今後諸色選人年及七十者並宜注優散官
年少未歷資考者不得任縣令

修晉朝實錄勅

五運相承歷代而猶傳鳳紀百王垂訓繼明而具載鴻猷
況今司契御乾握圖纂極事每循於師古政必究於化源
迨自金行成茲火德所請編錄庶補闕文其晉朝實錄宜
令監修國史蘇逢吉與史官賈緯竇儼王仲等修撰呈進